

Na osnovu člana 7. tačka 3. Odluke o utvrđivanju uvjeta, kriterija i postupaka za raspodjelu namjenskih sredstava od ekoloških naknada Ministarstva prostornog uređenja i zaštite okolice Tuzlanskog kantona, broj: 12/1-19-002816/25 od 05.02.2025. godine i broj: 12/1-19-008036/25 od 20.03.2025. godine, a u vezi sa Programom raspodjele namjenskih sredstava od ekoloških naknada Ministarstva prostornog uređenja i zaštite okolice za 2025. godinu sa budžetskim sredstvima i transferima, broj: 12/1-11-002313/25 od 03.02.2025. godine, Ministarstvo objavljuje:

## **JAVNI KONKURS**

**za sufinansiranje mjera smanjenja zagađenosti zraka na području Tuzlanskog kantona za 2025. godinu pojedincima – fizičkim osobama**

### **I. PREDMET JAVNOG KONKURSA**

Predmet javnog konkursa je dodjela namjenskih sredstava Ministarstva prostornog uređenja i zaštite okolice (u daljem tekstu Ministarstvo) za 2025. godinu, fizičkim osobama, za sufinansiranje mjera smanjenja zagađenosti zraka. Pravo učešća na javni konkurs imaju fizičke osobe koje imaju prebivalište na području Tuzlanskog kantona i koje u svom vlasništvu ili posjedu imaju individualni stambeni ili individualni stambeno – poslovni objekat na području Tuzlanskog kantona i da se ovi objekti koriste za stanovanje.

Predmet javnog konkursa nisu zgrade koje imaju upravitelja prema Zakonu o korištenju, upravljanju i održavanju zajedničkih dijelova i uređaja zgrade („Službene novine Tuzlanskog kantona”, broj: 14/15).

### **II. IZNOS SREDSTAVA ZA SUFINANSIRANJE**

Ministarstvo će u 2025. godini sufinansirati sljedeće mjere energijske efikasnosti i to:

- termoizolacija zidova, 50% od nabavke i ugradnje ne više od 5.500,00 KM,
- zamjena vanjskih vrata i prozora, 50% od nabavke i ugradnje ne više od 5.500,00 KM,
- ugradnja kotlova ili peći na goriva obnovljivih izvora energije (biomasa) 50% od nabavke i ugradnje ne više od 2.500,00 KM
- solarni fotonaponski sistemi za proizvodnju električne energije, 50% od nabavke i ugradnje, ne više od 6.000,00 KM.

### **III. POTREBNA DOKUMENTACIJA**

Podnosioci prijave dužni su dostaviti sljedeće dokumente kojima dokazuju ispunjavanje uslova za dodjelu sredstava za sufinansiranje mjera smanjenja zagađenosti zraka:

- a) **prijavni obrazac ispunjen i potpisan** i
- b) dokaz o prijavljenom prebivalištu podnosioca prijave – obrazac CIPS, original ne stariji od 3 mjeseca računajući od objave javnog konkursa,
- c) kućna lista kojom se utvrđuje broj članova domaćinstva, original od nadležnog općinskog/gradskog organa, ne starija od tri mjeseca, uz koju je potrebno dostaviti i dokaze o prijavljenom prebivalištu – obrazac CIPS, za sve članove domaćinstva koji su navedeni na kućnoj listi,
- d) original zemljišnoknjižnog izvotka ili posjedovnog lista ili kopija katastarskog plana, ne stariji od jednog mjeseca računajući od objave javnog konkursa izdat od strane nadležnog općinskog suda ili nadležne općinske/gradske službe, iz kojeg je vidljivo da je objekat koji je predmet javnog konkursa uplanjen i na kojem će se adresa podnosioca prijave slagati sa adresom iz CIPS-a,
- e) fotografije (u boji) vanjskog izgleda objekta koji je predmet javnog konkursa sa prikazom svih vidnih fasadnih ploha iz kojih je vidljivo da je objekat strukturno ispravan, to jest nema strukturalna oštećenja koja mogu ugroziti integralnu stabilnost objekta nakon implementacije mjera povećanja energijske efikasnosti (fotografije objekta izraditi u minimalno 4 primjerka sa kojih će biti vidljive sve strane objekta i spratnost objekta, orijentacija: sjever, jug, istok i zapad, na fotografijama mora biti vidljiv datum izrade fotografija koji ne smije biti stariji od tri mjeseca od objave javnog konkursa (datum ne može biti upisivan ručno) – za sve mjere,
- f) fotokopiju računa za usluge snabdijevanja električnom energijom za period od najmanje tri mjeseca prije objave javnog konkursa, u iznosu ne manjem od 100 kWh mjesečno (ostvarena potrošnja u kWh mora biti jasno vidljiva na dostavljenim računima) – posljednja tri mjeseca prije javnog konkursa,
- g) izjavu podnosioca prijave, ovjerenu kod nadležnog organa, da je saglasan da će Komisiji formiranoj od strane Ministarstva osigurati pristup objektu u cilju utvrđivanja realizacije odobrene mjere energijske efikasnosti, te da po izvršenoj ugradnji odobrene mjere energijske efikasnosti istu neće otuđiti i izjavu podnosioca prijave ovjerenu kod nadležnog organa kojom potvrđuje da nije koristio sredstva od drugog nivoa vlasti u BiH za mjeru koja je predmet prijave na Javni konkurs,

- h) izjavu suvlasnika/suposjednika, kojom se daje saglasnost za implementaciju mjere u objektu koji je predmet prijave na javni konkurs (ova izjava se dostavlja ukoliko je objekat, odnosno parcela u suvlasništvu), ovjerenu kod nadležnog organa i
- i) izrađena projektno tehnička dokumentacija za solarne fotonaponske sisteme (idejni projekat potpisan i ovjeren od strane projektantske kuće).

Obrasci izjava i prijavnog obrasca iz podtački a), g), h) biće u prilogu javnog konkursa i podnosioci prijave iste mogu preuzeti na zvaničnoj web stranici Ministarstva [www.mpuzotk.gov.ba](http://www.mpuzotk.gov.ba).

Podnosilac prijave je dužan dokaze o ispunjavanju uvjeta za dodjelu sredstava dostaviti u originalu (tačke b, c, d) i ovjerene izjave od nadležnog organa (tačke g i h), uz obaveznu naznaku kućne adrese i broja telefona podnosioca prijave.

#### **IV. DODJELA SREDSTAVA**

Prijedlog raspodjele sredstava daje komisija imenovana od strane ministra, cijeneći pri tome ukupan broj bodova utvrđenih na osnovu slijedećih kriterija:

- trenutno korišteno gorivo za zagrijavanje objekta (do 50 bodova),
- broj članova domaćinstva (do 30 bodova) i
- mjera energijske efikasnosti (do 20 bodova).

Na osnovu izvršenog bodovanja i raspoloživih sredstava Komisija će formirati preliminarnu listu. Ukoliko se prilikom bodovanja utvrdi isti broj bodova za više prijava, prednost će imati prijava koja je ranije podnesena.

Lista preliminarnih prijava na javni konkurs, koje ispunjavaju uslove javnog konkursa objavljuje se na web stranici Ministarstva. Na preliminarnu listu podnosilac prijave može podnijeti prigovor ministru Ministarstva prostornog uređenja i zaštite okolice, u roku od 8 (osam) dana, računajući od dana objave liste.

Dokaz o energijskom pregledu/auditu objekta koji je predmet prijave na javni konkurs (odnosi se na sve osim solarnih fotonaponskih sistema) izvršen od strane ovlaštenog lica u skladu sa Zakonom o energijskoj efikasnosti u Federaciji Bosne i Hercegovine ("Službene novine Federacije BiH", broj: 22/17) i Uredbom o provođenju energijskih audita i izdavanju energijskog sertifikata („Službene novine Federacije BiH“, broj 87/18), koji uključuje podatke o stanju fasade na objektu i uštede nakon implementacije projekta (energija i CO<sub>2</sub>), podnosioci prijava dužni su dostaviti u roku do 30 dana, **računajući od dana objave preliminarnih listi** kojima se utvrđuje ispunjavanje uslova iz ove tačke javnog konkursa.

Informaciju o licima ovlaštenim za vršenje energijskog pregleda/audita objekta zainteresovana lica mogu dobiti u Federalnom ministarstvu prostornog uređenja, putem linka <https://fmpu.gov.ba/energetska-efikasnost/registar/>. Smatra se da je podnosilac prijave odustao od prijave na javni konkurs ukoliko u roku do 30 dana od dana objave preliminarnih listi ne dostavi dokaz o energijskom pregledu/auditu objekta u pisanoj formi lično ili putem pošte na adresu Ministarstva koji je predmet prijave na javni konkurs.

Obveznici dostavljanja energijskih pregleda/audita biće podnosiocima prijave koji ostvare određeni broj bodova prema raspoloživim sredstvima.

Podnosioci prijave koji ostvare pravo na sufinansiranje mjere „solarni fotonaponski sistemi za proizvodnju električne energije“, nakon implementacije i uz dostavljanje gore navedene dokumentacije, dužni su Ministarstvu dostaviti i sve neophodne saglasnosti i odobrenja nadležnog Operatera distributivnog sistema/elektrodistribucije, ukoliko su iste potrebne.

Nakon objave konačne liste zaključit će se ugovor o sufinansiranju između Ministarstva i podnosioca prijave koji se nalazi na konačnoj listi, a koji će sadržavati prava, obaveze i odgovornosti ugovornih strana. Prilikom zaključivanja ugovora podnosilac prijave je obavezan donijeti i potvrdu/uvjerenje od banke o otvorenom žiro – računu na koji se mogu uplatiti sredstva nakon realizacije mjere energijske efikasnosti.

Nakon zaključenja ugovora podnosilac prijave će krenuti u realizaciju mjere energijske efikasnosti, te nakon implementacije iste Ministarstvu dostaviti sljedeće:

1. račun za nabavku i ugradnju (fiskalni – original ili duplikat fiskalnog računa i račun – otpremnica),
2. dokaz o izvršenom plaćanju računa od strane podnosioca prijave (izvod iz banke) i
3. zapisnik o implementaciji mjere energijske efikasnosti.

**Račun ne može biti izdat prije zaključenja ugovora između Ministarstva i korisnika sredstava.**

Dodjela sredstava će se izvršiti nakon što korisnik sredstava u potpunosti implementira mjeru energijske efikasnosti i dostavi navedene dokaze i zapisnik.

Korisnici sredstava sa kojima se zaključi ugovor dužni su realizirati mjeru energijske efikasnosti u roku od dva mjeseca od dana zaključenja ugovora. Korisnici sredstava koji ne ispune uslove iz ugovora biće dužni vratiti dodijeljena sredstva.

#### **V. ROK I NAČIN PODNOŠENJA PRIJAVA NA JAVNI KONKURS**

Javni konkurs ostaje otvoren 15 dana od dana objave na web stranici Ministarstva (<https://mpuzotk.gov.ba>), a objavit će se i na oglasnoj tabli Ministarstva, dnevnim novinama „Večernji list BH“ Mostar.

Neblagovremene prijave i prijave koje nisu dostavljene u skladu sa tačkom III. javnog konkursa neće se uzeti u razmatranje. Prijave na javni konkurs sa propisanom dokumentacijom dostavljaju se u zatvorenoj koverti putem pisarnice Vlade Tuzlanskog kantona ili preporučeno poštom na adresu: **Ministarstvo prostornog uređenja i zaštite okolice Tuzlanskog kantona, Rudarska 65, 75000 Tuzla, Bosna i Hercegovina**, sa naznakom: „Prijava na Javni konkurs za sufinansiranje mjera smanjenja zagađenosti zraka na području Tuzlanskog kantona za 2025. godinu – NE OTVARATI“.

#### **NAPOMENA:**

Podnosilac prijave može na javni konkurs prijaviti jednu od mjera energijske efikasnosti od navedenih u tački II Javnog konkursa. Ukoliko se objekat za koji se aplicira na javni konkurs nalazi u suvlasništvu samo jedan od suvlasnika može se prijaviti na javni konkurs.

Korisnici kojima su dodijeljena sredstva za sufinansiranje nekih od mjera energijske efikasnosti od Ministarstva prostornog uređenja i zaštite okolice TK u proteklom periodu po predmetnim javnim konkursima, nemaju pravo prijave na Javni konkurs za sufinansiranje mjera smanjenja zagađenosti zraka na području Tuzlanskog kantona za 2025. godinu.

**Adresa podnosioca prijave mora biti identična na sljedećim dokumentima (CIPS, vlasnički/posjedovni dokument i račun za električnu energiju).**

**Informacije o javnom konkursu mogu se dobiti na broj Ministarstva 035 369 428 u vremenu od 12:00 do 14:00 h.**